

დამტკიცებულია: ს.ს.ი.პ. „საქართველოს ადვოკატთა ასოციაციის“  
აღმასრულებელი საბჭოს 12.01.2018 წლის გადაწყვეტილებით

საქართველოს ადვოკატთა ასოციაციის

ადვოკატთა სოციალური დაცვის კომიტეტი

## დ ე ბ უ ლ ე ბ ა

### მუხლი 1. ზოგადი დებულებები

- 1.1. საქართველოს ადვოკატთა ასოციაციის (შემდგომში „ასოციაცია“) „ადვოკატთა სოციალური დაცვის კომიტეტი“ (შემდგომში „კომიტეტი“) წარმოადგენს ასოციაციის მუდმივმოქმედ ორგანოს.
- 1.2. კომიტეტი შექმნილია საქართველოს ადვოკატთა ასოციაციის წესდების 15.1 მუხლის “წ” პუნქტისა და 16<sup>1</sup> მუხლის შესაბამისად.
- 1.3. კომიტეტის საქმიანობის წესს (დებულებას) ამტკიცებს საქართველოს ადვოკატთა ასოციაციის აღმასრულებელი საბჭო.
- 1.4. კომიტეტი შექმნილია უვადოდ, უფლებამოსილებას იწყებს წინამდებარე დებულების დამტკიცებისთანავე.

### მუხლი 2. კომიტეტის საქმიანობის მიზანი

კომიტეტის მიზანია, ადვოკატების სოციალურ-ეკონომიკური და ჯანმრთელობის დაცვის პროგრამის განხორციელება, მათი მდგომარეობის შესწავლა და დასკვნის წარდგენა ადვოკატთა ასოციაციისათვის.

### მუხლი 3. კომიტეტის ამოცანები და საქმიანობა

3.1. კომიტეტის ამოცანებია:

3.1.1. შეისწავლოს ადვოკატის სოციალურ-ეკონომიკური და ჯანმრთელობის მდგომარეობა. მისი ფინანსური, ეკონომიკური და მატერიალური შესაძლებლობები.

3.1.2. ხელი შეუწყოს ადვოკატების ჯანმრთელობისა და სოციალურეკონომიკური მდგომარეობის გაუმჯობესებას.

3.1.3 კომიტეტი თანამშრომლობს შესაბამისი პროფილის სამთავრობო და არასამთავრობო ორგანიზაციებთან, გამოცდილების გაზიარების, საქმიანობის მეთოდებისა და პრაქტიკული ამოცანების შესწავლისა და გადაჭრის მიზნით.

### 3.2. თავისი ამოცანების განსახორციელებლად კომიტეტი:

3.2.1 მოიპოვებს და შეისწავლის კონკრეტული ადვოკატის სოციალურეკონომიკური და ჯანმრთელობის მდგომარეობის შესახებ ინფორმაციებსა და დოკუმენტებს.

3.2.2. ასოციაციის თავმჯდომარესა და აპარატთან კოორდინაციით, ახორციელებს ადგილობრივ და საერთაშორისო არასამთავრობო ორგანიზაციებთან და პროფესიულ ასოციაციებთან შესაბამისი პროფილით კვლევებს, პროექტებსა და წინადადებებს.

3.2.3. შესაბამისი პროფილით, ასოციაციის თავმჯდომარესა და აპარატთან კოორდინაციით, მონაწილეობს და აწყობს ფორუმებს, სამუშაო შეხვედრებს და კონფერენციებს .

3.2.4. ასოციაციისათვის შეიმუშავებს რეკომენდაციებს კონკრეტული ადვოკატების სოციალურეკონომიკური და ფინანსური დახმარების გაწევის საკითხებზე.

3.2.5. ასრულებს ნებისმიერ სხვა საქმიანობას, რომელიც დაკავშირებულია მისი მიზნებისა და ამოცანების განხორციელებასთან და არ ეწინააღმდეგება მოქმედ კანონმდებლობასა და ასოციაციის წესდებას.

### მუხლი 4. კომიტეტის შემადგენლობა

4.1. კომიტეტი შედგება არანაკლებ 7 და არაუმეტეს 15 ადვოკატი წევრისაგან.

4.2. კომიტეტს ჰყავს თავმჯდომარე და თანათავმჯდომარე, რომელსაც ნიშნავს და ათავისუფლებს აღმასრულებელი საბჭო.

4.3. კომიტეტის თავმჯდომარე და თანათავმჯდომარე აირჩევა კომიტეტის უფლებამოსილების ვადით.

4.4. კომიტეტის დანარჩენ წევრებს ამტკიცებს საქართველოს ადვოკატთა ასოციაციის აღმასრულებელი საბჭო კომიტეტის თავმჯდომარის წარდინებით.

4.5. კომიტეტის წევრები აირჩევიან 1 წლის ვადით. შესაძლებელია კომისიის წევრის ხელახალი არჩევა.

4.6. კომიტეტის წევრი შეიძლება ვადამდე იქნას გაწვეული კომიტეტის შემადგენლობიდან აღმასრულებელი საბჭოს გადაწყვეტილებით, კომიტეტის თავმჯდომარის მიმართვის საფუძველზე.

4.7 კომიტეტის თავმჯდომარეს უფლება აქვს კომისიაში მოიწვიოს სხვადასხვა დარგის ექსპერტები.

### მუხლი 5. კომიტეტის სხდომა

5.1. კომიტეტი თავის უფლებამოსილების განხორციელებისას ატარებს სხდომებს, რომლებიც მოიწვევა არანაკლებ თვეში ერთხელ. სხდომის ჩატარების დრო და ადგილი გაისაზღვრება კომიტეტის თავმჯდომარის მიერ.

5.2. კომიტეტის სხდომა ასევე შეიძლება მოწვეულ იქნას ასოციაციის თავმჯდომარის ინიციატივით.

5.3. კომიტეტის სხდომის მოწვევის ორგანიზაციულ საკითხებს უზრუნველყოფს კომისიის თავმჯდომარე ან თანათავმჯდომარე.

5.4. კომიტეტის მდივანი სხდომის ჩატარებამდე 3 დღით ადრე კომიტეტის წევრებს ელექტრონული ფოსტით უგზავნის ან ტელეფონით ატყობინებს სხდომის მოწვევის და დღის წესრიგის შესახებ.

5.5. კომიტეტის სხდომა უფლებამოსილია, თუ მას ესწრება კომიტეტის წევრთა მესამედზე მეტი. კომიტეტის თითოეული წევრი უფლებამოსილია დააყენოს წინადადება სხდომის დღის წესრიგში ცვლილებებისა და დამატებების შეტანის შესახებ.

5.6. კომიტეტი გადაწყვეტილებებს იღებს დამსწრე წევრთა ხმების უბრალო უმრავლესობით, თუ ამ დებულებით სხვა უმრავლესობა არ იქნება დადგენილი. ხმების თანაბრად გაყოფის შემთხვევაში გადაწყვეტია კომისიის თავმჯდომარის ხმა.

5.7. კომიტეტი გადაწყვეტილებებს იღებს ღია კენჭისყრით. გადაწყვეტილება შესაძლებელია მიღებულ იქნას ელექტრონული ფოსტით დადასტურებითაც, თუკი კომიტეტის წევრების სიითი შემადგენლობის უმრავლესობა ელექტრონული ფორმით გამოხატავს თანხმობას და ეს აისახება კომისიის სხდომის ოქმში.

5.8. კომიტეტის სხდომაზე დგება ოქმი, რომლსაც ადგენს მდივანი. ოქმს ხელს აწერს კომისიის თავმჯდომარე ან თანათავმჯდომარე და მდივანი, რაც ადასტურებს საოქმო ჩანაწერის სიზუსტეს.

## **მუხლი 6. კომიტეტის თავმჯდომარე/თანათავმჯდომარე**

6.1. კომიტეტის თავმჯდომარე კოორდინაციას უწევს კომისიის მუშაობას და უძღვება კომისიის სხდომებს.

6.2. ადვოკატთა ასოციაციის თავმჯდომარის წინასწარი თანხმობის საფუძველზე, კომიტეტის თავმჯდომარეს აქვს უფლება გააკეთოს საჯარო განცხადებები კომიტეტის საქმიანობასა და კომიტეტის მიერ მიღებული გადაწყვეტილებებთან დაკავშირებულ საკითხებზე.

6.3. კომიტეტის თავმჯდომარის მიერ თავისი უფლებამოსილების განხორციელების შეუძლებლობის შემთხვევაში, ადვოკატთა ასოციაციის თავმჯდომარის ანდა თავად კომიტეტის თავმჯდომარის თხოვნის საფუძველზე კომიტეტის მუშაობას კოორდინირებას უწევს თანათავმჯდომარე.

## **მუხლი 7. კომიტეტის სამდივნო**

7.1 კომიტეტის სამდივნოს ფუნქციებს ასრულებს საქართველოს ადვოკატთა ასოციაციის აპარატი.

7.2. მდივანი ორგანიზებას უწევს კომიტეტის შეხვედრისა და კომიტეტის სხდომის ოქმის შედგენას და მის ხელმისაწვდომობას დაინტერესებული პირებისათვის.

## **მუხლი 8. კომიტეტის საქმიანობის ფინანსური უზრუნველყოფა**

8.1. კომიტეტის წევრები თავის საქმიანობას ახორციელებენ საზოგადოებრივ საწყისებზე.

8.2. კომიტეტის მიერ ორგანიზებული ღონისძიებები და მოწვეული ექსპერტები შეიძლება დაფინანსდეს ასოციაციის ბიუჯეტიდან ანდა კომიტეტის მიერ, ასოციაციის თავმჯდომარესა და აპარატთან კოორდინაციით, მოძიებული გრანტის და შემოწირულობის სახსრებიდან.

8.3. კომიტეტისათვის გამოსაყოფი ბიუჯეტის ოდენობას ამტკიცებს აღმასრულებელი საბჭო.

8.4. გამოყოფილი სახსრების ხარჯვის მიმართულებებს განსაზღვრავს თავად კომიტეტი.

### **მუხლი 9. დებულების შეცვლა**

9.1. წინამდებარე დებულების ცვლილებებსა და დამატებებს, აგრეთვე დებულების ახალ რედაქციას ამტკიცებს საქართველოს ადვოკატთა ასოციაციის აღმასრულებელი საბჭო.

9.2. დებულების ცვლილებებისა და დამატებების ან დებულების ახალი რედაქციის პროექტს ასოციაციის აღმასრულებელ საბჭოს დასამტკიცებლად წარუდგენს კომიტეტის თავმჯდომარე.

### **მუხლი 10. დებულების მოქმედების ვადა**

წინამდებარე დებულება ძალაშია ადვოკატთა ასოციაციის აღმასრულებელი საბჭოს მიერ მისი დამტკიცების დღიდან და მოქმედებს კომიტეტის საქმიანობის ვადით.